



S E R M O N

CINQUANTE-TROISIÈME.

ACTES CHAP. SEPTIÈME
VERS. LI. LII. LIII. LIV.

Verf. LI. Gens de col roide & incirconfis de cœur & d'oreilles, vous vous aheursés toujours contre le Saint Esprit: comme vos peres ont fait, aussi faites vous.

Verf. LII. Lequel des Prophetes n'ont persecuté vos peres? ils ont mesme tué ceux là qui ont predit l'auenement du Iusse, duquel maintenant vous aués esté traistres & meurtriers,

Verf. LIII. Vous qui aués receu la Loi par la disposition des Anges, & ne l'aués gardée.

Verf. LIV. Eux oians ces choses creuoyent en leurs cœurs & grinçoient les dents contre lui.

LE



*L*E *juste*, comme dit le sage dans les Prouerbes, est affermé comme vn jeune lion : La terre & les enfers font la guerre à son innocence, tachans par leurs detractions & leurs faux témoignages de le faire passer pour vn méchant & vn impie, mais ayant Dieu & sa conscience pour lui, il soutient leurs efforts avec vn courage inuincible. Il ne se defend pas seulement contre les assauts de ses aduersaires, & contre leurs calomnies par les armes de la verité, de la raison, & de la justice, mais avec les mesmes armes il les bat & les cōfond, les conuainquant d'estre eux mesmes coupables des impietés & des cruautés dont il l'acusent faussement, & pour vser des termes du Prophete, *il rebrasse les pans de leur robe sur leur visage pour faire voir leur honte à tout le monde.* Il n'aprehende point leur malice ni leurs fureurs, mais leur resiste en face quelque chose qu'ils puissent ou machiner ou faire contre lui, & s'il lui faut seeler la verité de Dieu de son sang il s'en estime heureux pour glorifier son Dieu en sa mort aussi bien qu'en sa vie, & pour dire à sa derniere heure *l'ay combattu le bon combat, j'ay gardé la foi, i'ay*

paracheuè ma course, au reste j'attends la couronne de vie que le Seigneur juste iuge me rendra. Nous en auons vn exemple fort memorable en cette apologie de sainct Estienne, où apres s'estre puissamment & magnifiquement defendu contre la calomnie impudente & les faux tesmoignages de ceux qui l'acusoyent d'estre vn bla'phemateur ordinaire contre Dieu & contre sa Loi, comme vous l'aués ouï ci deuant, il retorque leurs aculations contr'eux mesmes, en leur disant comme vous venés de l'entendre, *Gens de col roide, incirconcis de cœur & d'oreilles, vous vous aheurtés tousiours contre le Sainct Esprit, comme vos peres ont fait ainsi faites vous &c.* C'est le suiet dont nous auons à parler en cette action moyennant la faueur de Dieu; où nous considererons d'vn costé la grauité de la censure qu'il leur fait, & de l'autre l'endurcissement horrible de leur cœur contre sa remonstrance. Au premier nous verrons comme il mortifie leur orgueil en tous les chefs desquels ils faisoient vanité, & comme il fait voir qu'en effect ils n'estoyent que des hypocrites & des impies. Ils se glorifioyent principalement de trois choses. Premièrement de la qualité de peuple de Dieu dont ils estoyent les Principaux & les Chefs, & de la mar-

que

que qu'ils en portoyent en leur chair, affa-
noir la circoncision. 2. des Peres desquels
ils estoient descendus : & en dernier lieu
de la Loi qu'ils auoyent receue de Dieu
par le Ministère des Anges. Mais ce saint
homme de Dieu leur fait voir que tant s'en
faut qu'ils puissent se preualoir d'aucune de
ces choses, qu'au contraire en toutes les
trois ils estoient grieuement coupables de-
uant le jugement de Dieu ; & pour les tou-
cher tant plus viuement & satisfaire à l'ar-
deur de son zele, il s'en exprime en termes
pleins de feu, & qui s'ils n'eussent esté mes-
chans iusques à la rage, les eussent faits re-
foudre dès l'heure mesme à se conuertir au
Seigneur avec vne vraie repentance de
leurs pechés. Il ne les flatte pas avec des
paroles de complaisance pour se les rendre
favorables en ce jugement encore qu'il y
allast de son honneur & de sa vie, mais leur
dit franchement toutes leurs verités cōme
vn vrai Ministre de Iesus Christ, & par l'im-
pulsion de son Esprit. Ce qui d'abord pour-
roit sembler ne s'acorder pas bien avec la
charité avec laquelle vn seruiteur de Dieu
doit reprendre ses freres, ni avec le respect
qui est deu aux puissances superieures, tel-
le qu'estoit cette assemblée du Souuerain
Conseil des Iuifs : mais ni cette sainte indi-

gnation qu'il a conceue contre leurs crimes ne choquoit point l'amour qu'il auoit pour leurs personnes, amour qu'il retenoit en son cœur si pur & si ardent iusques à son dernier soupir, que mesme lors qu'ils le lapidoient, il prioit Dieu qu'il ne leur imputast point ce peché, au contraire plus il les aimoit, plus il se sentoit obligé à les censurer de leurs vices afin de les sauuer par frayer comme les attachant hors du feu; ni l'honneur qu'il deuoit aux Magistrats que Dieu a establis sur la terre, ne les deuoit pas empescher de resister en face à ces meschans qui tournoient contre Dieu & contre son Oinct la puissance & l'authorité qu'ils en auoyent receue, & de tonner contre vne impieté si horrible. Il sauoit bien ce qu'il deuoit à leur autorité, & ce que la Loi dit *Tu ne mesdiras point du Prince de son peuple*, mais il sauoit aussi à quel maître il seruoit, au nom & en l'authorité de qui il parloit, le zele qu'il deuoit à la defence de la cause de Iesus Christ, & quel traitement meritoient des impies & des meschans qui faisoient la guerre si ouuertement à Dieu & à son Christ, & qui pechoient si outrageusement contre le Saint-Esprit. C'est pourquoy il leur parle avec la vehemence que vous voyés *Gens de col roide,*

de, dis-il, & incircōcis de cœur & d'oreilles & c.
Il les apelle premieremēt, *des gens de col roide*, de vrais enfās de Belial qui ne pouuoÿēt souffrir le joug de la discipline de Dieu, quoi qu'ils fissent profession d'estre ses seruiteurs, mais roidissoÿent leur col avec vne horrible fierté toutes les fois que ses seruiteurs se mettoÿent en deuoir de le leur imposer, & de les attacher de ses liens disāns insolēment comme il auoit esté predit au Pseaume 2. *Rompons leurs liens & jettons arriere de nous ses cheuestres*. Il les apelle en suite & en mesme sens. *Des gens incircōcis de cœur & d'oreilles*. *Incircōcis de cœur*, parce qu'encore qu'ils fussent bien circoncis exterieurement quant à la chair, *leur cœur*, c'est à dire leur esprit, leur volonté & leurs affections, auoyent tousiours son prepuce au dedans, c'est à dire, leur incredulité, leur malice, leur impieté naturelle, *toute l'imagination des pensées de leur cœur n'estant que mal en tout temps*. *Incircōcis d'oreilles*, parce que toutes les fois qu'on leur preschoit Iesus Christ & sō Evāgile, ils bouchoÿent leurs oreilles comme l'aspic sourd, comme s'ils lui eussent dit tout ouuertement avec les profanes au liure de Iob, (Iob 21. 14.) *Retire toi de nous car nous n'auons que faire de la science de tes*

voies: & ainsi orrés vous au texte immédiatement suiuant que quand saint Estienne leur dit *Je voi les Cieux ouuerts & Iesus Christ à la dextre de Dieu*, ils se mirent à crier & estouperent tous leurs oreilles, s'obstinants fierement contre l'esprit qui parloit par sa bouche. C'est pourquoy il ajoute tres iustement, *Vous resistés tousiours au Saint Esprit*. Vous trouuerés possible estrange qu'il die qu'ils luy resistent, veu qu'au contraire saint Luc a dit au precedent chapitre *qu'ils ne pouuoient resister à la sapience de saint Estienne & à l'esprit par lequel il parloit*: Mais la difficulté n'est pas grande, car comme quand vn foible murin prend les armes contre vn plus fort que lui, il est tres-vrai de dire qu'il ne lui sauroit resister veu l'inegalité de leurs forces, & neantmoins qu'il lui resiste entant que par vne sole presumption & vne temerité ridicule, il entre en combat avec lui: ainsi est-il tres-vrai de dire, du combat de ces gens là contre saint Estienne, *qu'ils ne lui pouuoient resister*, parce qu'ils ne pouuoient respondre à ses discours tant ils estoient clairs & solides, qu'ils ne pouuoient nier ni les miracles que Diou faisoit par lui, ni ceux que Iesus Christ auoit faits en si grand nombre parmi eux, & que leur sa-

gesso

geste estoit engloutie par la lieue, comme autre fois la verge de Moÿse engloutit toutes celles des Magiciens de l'Egypte; & neantmoins qu'ils lui resistoyent, parce qu'encore qu'ils succombassent sous le poids & la force de ses raisons, ils ne laissoyent pas de s'y opposer de toute leur puissance; ainsi ils resistoyent vraiment au Saint Esprit, Premièrement parce qu'ils combattoyent contre la verité qu'il leur reueloit en l'Evangile: car condamner comme vne erreur, vne heresie & vne impieté, vne doctrine dont il estoit l'auteur, c'estoit le faire vn Docteur de mensonge & l'outrager insolemment: en second lieu parce qu'ils contredisoient hautement à ceux qui la leur annonçoient par son immediate inspiration; car comme quand Ananias & Sapphira mentoyent aux Apostres, saint Pierre leur dit *Qu'ils ne mentoyent pas aux hommes mais au Saint Esprit*, aussi la resistance qu'ils faisoient à ses seruiteurs, estoit vne resistance faite à lui mesme: Finalement parce qu'encore que le Saint Esprit les conuinquist en leurs consciences que nostre Seigneur Iesus Christ estoit vraiment le Fils de Dieu & le Sauueur du monde duquel tous les Prophetes auoyent parlé; encore qu'ils en eussent des preuues

tres-certaines en tant de miracles qu'il auoit faits lui mesme, & qu'il faisoit encore par ses Ministres tous les jours; encore qu'ils seussent tres-bien qu'ils l'auoyent tres-iniustement condamné & fait mourir en vne Croix; ils ne laissoyent pas de continuer à lui faire la guerre & de s'opposer de tout leur pouuoir à l'establissement de son reigne: qui est proprement ce peché que Iesus Christ appelle *peché contre le Saint Esprit*, & duquel il declare, *Que tout peché contre le Pere & contre le Fils sera pardonné à ceux qui s'en repentiront, mais que le peché contre le Saint Esprit ne sera pardonné ni en ce siecle ni en celui qui est à venir, & auquel ceux qui tombent ne peuuent* (comme dit l'Apostre en l'Epistre aux Ebieux) *estre renouvelés à repentance.* Or remarqués qu'il ne dit pas seulement, qu'ils resistoyent alors au Sainct Esprit, mais *qu'ils y resistent tousiours*, parce qu'ils ne commençoient pas alors, mais qu'ils en auoyent tousiours fait de mesme. Il leur auoit enuoié Iean Baptiste pour leur montrer au doigt *l'agneau de Dieu qui oste les peches du monde*, & ils n'auoyent pas voulu reconnoître ce grand Sauueur qu'il leur montrait, & auquel il leur recommandoit de croire. Iesus Christ lui mesme plein du Sainct Esprit &

reueſtu

reuestu de tous les dons, estoit venu à eux & ils l'auoyent reietté comme vn imposteur, l'auoyent condamné comme tel, l'auoyent chargé de toutes sortes de conuices, & banni de leurs Synagogues tous ceux qui le reconnoistroyent. Il leur auoit enuoie les Apostres pour leur prescher la verité, & ils les auoyent reiettés, condamnés & fouettés, avec toutes sortes d'opprobres, leur defandant sous de grieues menaces de plus prescher au Nom de Iesus Christ. Il leur enuoioit encore alors saint Estienne, & ils s'opposoyent à lui tout de mesme: ainsi il leur disoit avec tres-grande raison *Vous resistés tousiours au Saint Esprit,* De quoi donc vous sert il de vous dire le peuple de Dieu auquel vous faites incessamment la guerre? De quoi vous sert il de porter en la circoncision de vostre chair le Sacrement de la regeneration par le Saint Esprit, puis que vostre cœur incirconcis lui resiste si fierement & si obstinement?

Ils se glorifioyent en second lieu des Peres desquels ils estoyent descendus & dont ils imitoyent les exemples. Mais oies ce que leur dit là dessus le glorieux martyr saint Estienne. Ces Peres qu'ils suiuyent n'estoyent pas Abraham Isaac & Iacob, car s'ils eussent esté vraiment enfans

de ces saints Patriarches , ils eussent imité leur foy , leur obeissance & leur sainteté, ce qu'ils ne faisoient pas : *Si vous estiez enfans d' Abraham*, leur disoit Iesus Christ, *vous feriez les œuvres d' Abraham* mais vous cherchez de me faire mourir parce que ie vous ai dit la verité , *Abraham n'eust pas fait cela*, C'estoyent les anciens rebelles Israélites, ces adorateurs du veau d'or , ces murmurateurs ordinaires contre Dieu & contre Moyse, ces persecuteurs des gens de bien , ces meurtriers enfin des Prophetes contre lesquels les Prophetes ont tant crié: de ces peres là donc il leur dit , *Comme vos peres ont fait , ainsi faites vous* Ils ont roidi leur col contre la Loi de Dieu , & n'ont pas voulu recevoir son joug , dont Dieu dit à Moyse Exo. 32. *L'ay regardé ce peuple & voici c'est un peuple de col roide. Va donc & leur dis vous estes un peuple de col roide , & pourtant ie monterai tout à coup contre toi & te consumerai ; ainsi en faites vous.* Ils n'ont pas circoncis leur cœur comme Dieu le leur avoit commandé disant , *Vous hommes de Juda & habitans de Ierusalem soyez circoncis à l'Eternel , & estes le prepuce de vostre cœur de peur que ma fureur ne sorte comme un feu & qu'elle ne s'embrase & qu'il n'y ait personne qui l'esteigne à cause de la malice de vos actions.*

actions ; Aussi en faites vous. Ils auoyent des oreilles charnelles & non circonscises, & s'ils oyent la voix de Dieu, ils n'auoyent aucune disposition à lui obeir, mais disoyent impudemment à son Prophete
Quant à la parole que tu nous as dite au nom de l'Eternel nous ne t'escouterons point mais ferons pour certain tout ce qui sortira de nostre bouche, & ferons des encensements à la Reine des Cieux, nous suiurons nos passions & exécuterons vn chacun la dureté de son cœur mauvais dont Dieu disoit Ieremie 6. A qui parlerai-je & qui sommerai-je afin qu'ils escoutent ? Voici leur oreille est incirconscise & ils ne peuvent entendre. La parole de l'Eternel leur est vn oreiller. Ils n'y prennent point de plaisir : Les vostres en sont tout de mesme. Ils ont esté rebelles contre Dieu & ont contristé l'Esprit de sa sainteté, dont il leur est tourné en ennemi, comme il est dit Esaie 63. Vous aussi résistés tousiours au Saint Esprit. Lequel des Prophetes n'ont persecuté vos peres ? N'ont ils pas affligé l'esprit de Moysse quand il a esté avec eux ? & n'a-t-il pas esté souuent parmi eux en danger de la vie ? N'ont ils pas contraint Elie de s'enfuir dans vn desert ? N'ont ils pas emprisonné Ieremie le deualans dans vne fosse & le faisans enfondrer dans la boue où il fut peri mal ;

heureusemēt sans l'humanité dont Hebed-
meles vsa enuers lui? N'ont ils pas mis aussi
Michée en prison pour auoir dit la verité
de la part de Dieu? Et n'en faites vous pas
de mesme auourd'hui enuers les Apostres
de Iesus Christ & presentement enuers
moi, en me chargeant de calomnies & me
faisant respondre comme vn criminel de-
uant vostre assemblée: Quand Dieu leur a
enuoié ses Prophetes qui leur ont predict de
sa part l'auenement du juste & qui ont esté
cōme des trompettes qu'il faisoit marcher
deuant lui pour preparer les esprits de son
peuple à le receuoir avec respect & avec io-
ye quand il arriueroit, au lieu de leur sauoir
bon gré de la prediction d'vne chose si de-
sirée & de les en aimer & honorer il les ont
mis à mort: & vous, n'aués vous pas auourd'
d'hui cette mesme humeur sanguinaire, ce
mesme esprit meurtrier, contre ceux qui
vous preschent la venue de ce Iuste & qui
vous exhortent à croire en lui pour estre
justifiés & sauués? Vous aués bien fait pis
encore, vous aués fait mourir proditoire-
ment ce juste mesme qui estoit venu pour
vous sauuer. Il l'apelle *le Iuste*, parce que
les Prophetes qui auoyent predict sa venue
l'auoyent ainsi qualifié; comme quand il
est dit Esaie 55. *Mon seruiteur iuste en iustifie-*

ra plusieurs, &c. & Ierem. 33. En ces iours là
ie ferai germer à David vn germe iuste qui
exercera iugement & iustice en la terre. Et
Zacharie 9. Ton Roi viendra à toi estant iuste.
Et ils l'auoyent ainsi apelé, tant parce qu'il
deuoit estre parfaitement iuste en lui mes-
me & estre proposé aux fideles pour vn pa-
tron accompli de toute justice, c'est à dire,
de nostre justification deuant Dieu, dont
il est dit en Ieremie qu'il seroit apelé l'E-
ternel nostre iustice, & en David, qu'il ama-
neroit la iustice des siècles: Et les Apostres
ont suiui en cela le stile des Prophetes;
comme quand ils ont dit que les Iuifs ont
renié le saint & le iuste: que Iesus Christ
est mort lui iuste pour les iniustes, & que nous
auons vn Auocat enuers Dieu le pere assa-
uoir Iesus Christ le iuste. Il dit que les Pro-
phetes ont predict l'auenement de ce iuste; com-
me sainct Pierre a dit ci deuant que tous les
Prophetes depuis Samuel ont predict ces iours;
& au premier chapitre de sa premiere Epi-
stre, Que l'Esprit Prophetique qui estoit en
eux en a rendu tesmoignage auparauant & a
déclaré les souffrances qui auendroyét à Christ
& les gloires qui s'en deuoient ensuiure. Cho-
ses qu'ils ont exprimées si clairement avec
toutes leurs particularités & leurs circon-
stances, que nostre Seigneur accusoit d'vne

480 *Sermon Cinquante-troisième*

extreme stupidité ceux qui ne les entendo-
 yent pas comme quand il disoit aux deux
 disciples allans en Emmaus; O gens despour-
 ueus de sens & tardifs de cœur à croire à toutes
 les choses que les Prophetes ont prononcées: Ne
 falloit il pas que le Christ souffrit ces choses, &
 qu'ainsi il entrast en sa gloire? Or ces saints
 hommes l'ayans predict aux Iuifs qui viuo-
 yent en leur temps, comment est ce qu'ils
 les ont traittés? Ils ont meurtri, dit sainct
 Estienne, ceux qui leur ont predict l'auen-
 ment du iuste: Car encore que les histoires
 ne nous en soyent pas rapportées dans les
 anciennes Escritures nous n'en pouuons
 aucunement douter, Veue ce que Iesus
 Christ leur dit Matth. 23. Vous dites, si nous
 eussions esté aux jours de nos peres nous n'eus-
 sions pas esté leurs compagnons au sang des
 Prophetes; ainsi estes vous tesmoins contre
 vous mesmes que vous estes enfans des meur-
 triers des Prophetes: vous aussi dont achemés
 de remplir la mesure de vos peres: Serpens,
 engances de viperes, comment euitrés vous
 le iugement de la gehenne? Pourtant ie vous
 enuote des Prophetes, des sages & des Scribes,
 & vous en iuerés, & vous en crucifiérés & en
 fouetterés en vos Synagogues, & les poursui-
 urés de ville en ville afin que vienne sur vous
 tous le sang iuste qui a esté respardu en la terre
 depuis

depuis le sang d'Abel le iuste iusques au sang de Zacharie que vous aués mis à mort entre le Temple & l'Autel. Ierusalem Ierusalem qui tués les Prophetes combien de fois ayie voulu rassembler tes enfans, comme la poule rassemble ses pousins sous ses aïles & vous n'aués pas voulu; si cela n'eust esté tenu pour certain & indubitable parmi les Iuifs nostre Sauueur ne le leur auroit pas reproché ainsi publiquement, autrement les Iuifs eussent crié aussi tost à la calomnie; Mais Iesus Christ & saint Estienne reprochent bien vn plus grand crime aux Iuifs de leur temps, assauoir d'auoir fait mourir le maistre & le chef des Prophetes duquel ces saints hommes de Dieu auoyent predit l'auenement: Iesus Christ par la parabole des meschans ouuriers qui apres auoir fait mourir les seruiteurs que leur maistre leur enuoioit ont fait mourir son propre fils qu'il leur auoit enfin enuoïé: parabole en laquelle eux mesmes ont fort bien reconnu que c'estoit à eux qu'il parloit. Et saint Estienne par ces mots qu'il aioute, *Duquel vous aués esté traistres & meurtriers*, Il les nomme traistres à cause des embusches qu'ils ont dressées plusieurs fois à sa vie, des artifices de toutes sortes qu'ils ont employé pour le surprendre & de ce qu'à la fin ils

ont corrompu par argent vn de ses disciples pour le trahir , ont suborné de faux témoins contre lui, l'ont déclaré en leur conseil homme digne de mort, l'ont liuré à Pilate, l'ont liuré comme vn criminel à vn juge infidele pour le faire mourir , eux qui lui estoient si obligés pour leur auoir si diuinement reuelé les secrets de son pere, pour leur auoir offert son service avec tant d'amour , pour auoir deliuré leurs Demoniaques , gueri leurs malades , & ressuscité leurs morts : & les appelle *des meurtriers*, parce qu'encore qu'ils ne l'ayent pas fait mourir eux mesmes, ne leur estant pas permis, comme ils disoyent , de mettre aucun à mort ; neantmoins l'ayans liuré à Pilate pour le faire mourir & lui ayans crié avec vne fureur enragée *Crucifie, Crucifie*, c'est autant que s'ils l'auoyent eux mesmes tué comme aussi saint Paul dit , *qu'ils ont crucifié le Roi de gloire*. Voila le beau suiet qu'ils auoyent de se glorifier de leurs peres.

Le dernier suiet dont ils se vantoyent, est ce qu'ils auoyent la Loi ; mais saint Estienne leur montre ici que tant s'en faut qu'estans tels qu'ils sont ils s'en doiuent glorifier , que c'est ce qui les rend plus coupables & plus execrables deuant le Iugement de Dieu. *Vous*, dit-il, *qui aués re-*

eu la Loi par la disposition des Anges & qui ne l'aue's pas gardée. Dieu leur auoit bien donné sa Loi qui leur estoit bien sans doute vne grande prerogatiue par dessus toutes les nations de la terre *ausquelles il n'en a pas fait ainsi*, comme il est dit au Pseume 147. & mesme il la leur auoit donnée *par la disposition*, c'est à dire, par le Ministere des Anges du milieu desquels il auoit fait entendre sa voix en la montagne de Sina, comme le remarque aussi l'Apostre Gala. 3. quand il dit *Quelle a esté ordonnée par les Anges par le Ministère d'un Moyennneur*: & Hebreux chap. 2. quand il l'apelle *la parole prononcée par les Anges*. Il dit *des Anges* & non *d'un Ange*, parce que ce n'a pas esté vn seul Ange qui a esté sur la montagne, mais plusieurs Anges qui ont serui à former tant la voix par laquelle Dieu s'est reuelé à son peuple, que les esclairs qui s'y voyoyent, & ces épouuantables tonnerres qu'il y faisoit entendre. Or où nous auons traduit *par la disposition des Anges*, on pourroit bien traduire, *parmi les bandes des Anges*, parce que le mot qui est dans le texte n'est pas en singulier, mais en pluriel, & qu'il se deriue d'un verbe qui signifie souuent dans les liures des auteurs Grecs, *ranger en bataille*, & que la multi-

rude des Anges est souuent exprimée par des legions & des armées : mais en quelque façon qu'on le traduise il n'importe, l'un & l'autre reuenant à un mesme sens, assauoit que les Anges sont interuenus avec Dieu en cette promulgation de sa Loi ; circonstance qui montre avec quelle solennité & magnificence Dieu l'a donnée aux Israelites pour la leur rendre en toutes façons venerable. Mais que leur a-t-il serui de l'auoir receue avec tant de solennité & de pompe, veu qu'ils en ont si mal usé ? Vous l'aués receue, dit saint Estienne, & vous ne l'aués pas gardée. Vous l'aués receue par la disposition des Anges & l'aués violée par la suggestion des Demons. Vous l'aués receue pour y apprendre à seruir Dieu en esprit & verité, & vous aués souillé sa religion par toutes sortes d'impuretés. Car si vous n'idolâtrés pas comme ont fait vos peres, vous n'en estes en rien meilleurs ayans changé la vraie pieté en hypocrisie, en superstition & en sacrilege, & ayans fait de la maison de Dieu vne cauerne de brigands. Vous l'aués receue pour vous y former à la vraie sainteté, & toute vostre vie n'a esté que profanation ou hypocrisie. Vous l'aués donc receue, mais à vostre condamnation : si vous ne l'aués pas

pas receue vous series en quelque façon excusables, au moins ne series vous pas plus coupables que les Payens qui ne l'ont pas receue; mais l'ayans receue de Dieu comme vous aués fait & ne l'ayans pas observée, vous estes sans excuse, & beaucoup plus punissables qu'eux: *Car le serviteur qui fait la volonté du maistre & ne la fait pas sera batu de plus de coups.*

Voila ce que ce bien-heureux martyr a représenté à ces meschans, ou pour les convertir à Dieu ou pour les rendre excusables; mais voyons maintenant comme ils ont receu son admonition. Saint Luc nous l'apprend quand il dit, *Eux oyans ces choses creuoyent en leurs cœurs & grincoyent les dents contre lui.* S'ils eussent eu quelque étincelle si non de piété, au moins de bon sens; & quelque mouvement, si non, d'amour de Dieu, au moins de considération de leur propre bien & de desir de leur salut; il n'y a point de doute que cette parole qui est *comme un feu & cōme un marteau qui debris la pierre, ce glaive à deux tranchans qui penetre jusques à la diuision des jointures & des moelles,* ne les eust viue-ment touchés pour se repentir de leurs fautes & en demander pardon à Dieu; mais

Hh 4

au lieu de cela ils se sont irrités comme des
 frenetiques contre leur Medecin, ils ont
 regimbé fierement contre les eguillons,
 ils ont endurci leurs cœurs comme vne ro-
 che, ils ont refusé de se convertir: Ils ont
 fait contre saint Estienne la mesme chose
 qu'ils auoyent fait contre nostre Seigneur
 Iesus auquel ils auoyent dit toutes sortes
 d'injures, & fait toutes sortes d'outrages
 quand il leur remonstroit leur deuoir; la
 mesme chose qu'ils auoyent faite contre
 les Apostres dont il a cité dit ci deuant au
 5. chapitre de cette histoire que ces saints
 hommes leur disans, *Le Dieu de nos peres a
 ressuscité Iesus lequel vous aués mis à mort le
 pendant au bois. C'est celui que Dieu a estelé
 par sa dextre pour Prince & pour Sauueur
 pour donner repentance à Israel & remission
 des pechés, & nous lui sommes tesmoins de ce
 que nous disons & le Saint Esprit aussi que
 Dieu a donné à ceux qui lui obeissent, ces mal-
 heureux en grinçoient les dents & consul-
 toient de les mettre à mort. O que ce que
 dit l'Escriture est bien vrai! Que le cœur de
 l'homme est de desesperement malin, Que quand
 on pileroit le fol comme on pile le grain au
 mortier, sa folie ne se departira pas de lui, &
 qu'il est impossible que ceux qui pechent
 contre le Saint Esprit soyent renouvelés à
 repentance!*

repentance! ô qu'ils ont bien verifié ce qu'il leur disoit, Vous resistés tousiours au Saint Esprit! ô que leur conscience estoit bien endurcie & cauterisée, puis qu'ils n'ont peu estre touchés d'une si sainte & si puissante remonstrance; mais au contraire en sont deuenus plus felons, plus malins & plus furieux!

Faisons nostre profit, *Chers Freres*, de ce que nous venons d'entendre & du zelo de saint Estienne & de la fureur de ses aduersaires. De son zelo aprenons, nous qui auons l'honneur de seruir à Dieu en l'Euangile de son Fils, avec quelle liberté quelle constance, quelle force & ferueur d'esprit nous deuons parler pour la cause de nostre Seigneur Iesus Christ, & contre l'impieté de ses ennemis: Representons nous vn chacun qu'il nous dit comme à Esaie *Crie à plein gosier ne s'épargne point, esleue ta voix comme vn cornet, & di à Israel ses forfaits &c.* & comme à Ieremie, *J'ay mis mes paroles en ta bouche & t'ay établi sur les nations, afin que tu arraches & que tu plantes, que tu destruises & que tu basses Trousse donc ta langue & te leue & leur dis toutes les choses que ie te commanderai de dire, ne sois point espouuanté, ne crain point pour ne te trouuer pas d'eux de peur que*

ie ne te froisse deuant eux. Il t'ay establi comme
 une ville munie & comme une colonne
 de fer & une muraille de fer contre les prin-
 cipaux du pais, contre les Sacrificateurs &
 contre tous son peuple; tellement qu'ils batail-
 leront contre toi, mais ils ne seront pas plus
 forts que toi, car ie suis avec toi pour te deli-
 urer. Parlons hardiment aux plus grands
 quand Dieu nous y appelle, comme a fait
 vn Moysé à Pharaon, vn Elie à Achaz, vn
 Elisée à Ioram, vn Iean Baptiste à Herode,
 & comme vous voies ici qu'a fait saint
 Estienne au grand Conseil des Iuifs, & ne
 craignons pas de leur deplaire & d'encou-
 rir leur indignation en leur ditant leurs ve-
 rités quand il est necessaire, mais nous ar-
 mons de cette pensée que ce grand Dieu
 au Nom duquel nous parlons sera nostre
 garant & nostre defendeur contre les mali-
 ces & les fureurs de Satan & du monde.
 Vous tous, *Mes Freres*, aprenés en aussi à
 vous opposer courageusement aux pechés
 & aux impietés de ce siecle, vous souue-
 nans tousiours de ce qu'il nous commande
 en sa Loi *Tu redargueras soigneusement ton
 prochain & ne souffriras point de peché en lui,*
 & de ce que nous ordonne saint Paul, *Ne
 communiqués point aux œuures infructueuses
 de tenebres, mais redargués les plustost: Con-
 siderés*

regardez vous les uns les autres (selon l'exhortation de saint Iude) en la dilection de Dieu: ayez pitié des uns en usant de discretion, & sauvez les autres par frayeur comme les arrachans hors du feu. Ne leur épargnez pas les paroles libres, fortes & enflammées qui les peuvent toucher & amener à repentance, mais soyez leur ce que furent les Anges à Lot pour les tirer hors de la Sodome spirituelle & pour les garantir du feu & du souffre du Ciel. Si vous ne les pouvez sauver, au moins sauvez vous vos ames, & leur amasserez quant à eux des charbons de feu sur la teste, pour les mettre entierement hors d'excuse deuant le Jugement de Dieu.

Quant aux aduersaires de saint Estienne qu'il appelle ici des gens de col roide & incircconcis de cœur & d'oreilles, & auxquels il reproche qu'ils résistent toujours au saint Esprit, nous blasmons tous, & avec tresgrande raison, la peruersité de leur naturel & l'endurcissement de leur cœur, mais prenons garde que les blasmans nous ne nous facions le procès à nous mesmes en nous obstinant en nos vices, l'auaricieux en son auarice, l'ambitieux en sa vanité le querelleux en ses contentions, le mesdisant en ses vengeances, le joueur en son jeu, le disso-

lu en ses debauches, & le profane en son impieté contre les remonstrances & les censures qui nous sont faites tous les iours en ce Temple, de peur qu'il ne nous soit dit aussi bien qu'à eux, *Gens de col roide & incirconcis de cœur & d'oreilles vous résistés toujours au Sainct Esprit.* Ployons le col en toute humilité sous le joug de sa discipline & le portons paisiblement en toute nostre vie. Circoncisons nos cœurs & nos oreilles pour escouter sa voix avec la reuerence que nous deuons, & nous ranger de bonne foi à son obeissance. Ne nous vantons pas du baptesme que nous auons receu exterieurement en l'Eglise comme ces Iuifs rebelles de la circoncision qu'ils auoyent receue en leur chair; mais montrons par la pureté & l'innocence de nos meurs, que nous sommes vraiment baptisés en l'homme interieur par l'esprit de regeneration & de sainteté, & au lieu de lui résister comme ont fait ceux là, conduisons nous en toutes choses par ses enseignements & par ses inspirations, sachans que comme nous enseigne saint Paul, *Si quelcun n'a pas l'esprit de Christ, celui là n'est pas à lui, mais que tous ceux qui sont conduits par l'Esprit de Dieu sont enfans de Dieu & que si nous vivons selon la chair nous mourrons, mais si par l'esprit nous*

nous

nous morissons les faits du corps nous vivrons.
Ceux là qui estoient vne engance de gens malins, &, comme disoit Iesus Christ, *vne engance de viperes*, ont suiui les mauvais exemples & l'impieté de leurs peres, dont saint Estienne leur a dit, *Comme ont fait vos peres, ainsi faites vous* : Nous au contraire retirons nous le plus que nous pouuons, des pechés & des vices de ceux qui nous ont deuancés, comme les enfans sages s'abstiennent volontiers des choses par l'usage desquelles ils voyent que leurs peres & leurs ayeuls sont tombés en des maladies dangereuses, de peur d'y tomber apres eux & de les continuer en leur race.

Remarquons bien en troisiéme lieu ce que nous auons entendu que les Prophetes du Seigneur ont esté tousiours persecutés, & persecutés par ceux là mesmes qui tenoyent les premiers rangs en l'Eglise, pour ne nous scandaliser pas quand nous nous voions persecutés tout de mesme par ceux là mesme qui se disent l'Eglise, & par ces grands Prelats & Docteurs qui se disent ne pouuoir errer & qui tyrannisent les consciences. C'a esté cette sorte de gens qui a le plus persecuté nostre Seigneur Iesus Christ, & apres lui ses Apostres & ses autres Ministres. Ce sont eux qui nous

persecutent encore maintenant, allumant le feu contre nous dans les esprits des Princes & des peuples, mais nous ne nous en devons pas effraier, car Dieu pour la cause duquel nous souffrons cette persecution là, est puissant pour les reprimer & pour nous delivrer de leurs mains. Combattons donc d'un grand courage par la foy de son Euangile, sans estre en rien espouventés par les aduersaires.

Finalemēt quand nous oions comme ces mal heureux au lieu de faire leur profit de la remonstrance de ce saint homme, pour demander pardon à Dieu de leurs fautes & pour se corriger de leurs vices, en creuoyent en leurs cœurs & grinçoient les dents contre lui, reconnoissons quel est le naturel des meschans, qui (comme dit Amos) *haïssent ceux qui les redarguent & ont en abomination celui qui parle en integrite*, ne pouuans souffrir la liberté des seruiteurs de Dieu quand ils les admonestent de leur deuoir, mais s'irritans contre eux, & estans impatients de toute censure, quoi qu'ils sachent en leur conscience qu'ils l'ont bien meritée; & ne les imitons pas en cela, mais quand nous sommes repris de nos pechés prenons en gré cette correction & unissons avec le Prophetes

(Pie.

(Pse. 141. 5.) *Que le juste me mette ce me sera un baume excellent, nous souvenans de ce que dit le sage au liure des Proverbes Qui rebuse l'instruction a en dedain son ame, mais qui escoute la reprehension s'acquiert du sens, & qu'il vaut mieux ouir comme on est tansé par le sage que d'ouir la chanson des fols. C'est le moyen de profiter & de nous avancer en l'estude de la sanctification, de destourner les jugemens de Dieu de dessus nos testes, & de rappeler au milieu de nous sa benediction & sa grace quand nos pechés l'ont esloignée de nous. Profitons donc à l'avenir mieux que nous n'avons fait par le passé, soit des remonstrances publiques qui nous sont faites ordinairement en ce lieu, soit des censures qui nous sont appliquées en particulier par les fideles serviteurs de Dieu qui veillent pour nos ames comme ayans à en rendre conte, afin que Dieu ayant nostre docilité agreable detourne son ire de dessus nous, & nous réjouisse au prix des iours auxquels il nous a affligés, & nous face sentir son amour par toutes sortes de benedictions & de graces, jusques à*

494 *Sermon Cinquante-troisième*
ce qu'en fin il nous admette à sa bea-
ritude eternelle pour l'amour de son
Fils vnique, auquel avec lui & le Saint
Esprit soit honneur, & gloire, & magnifi-
cence &c.



SERMON